

Rapport dal president 2019

Stimadas commembras
Stimads commembers,

Il on scuorrs es stat per la società da chatschaders Lischana, per il BKPJV e dafatta per tuot la chatscha Grischuna fich turbulent. Tuot il cumbat cunter l'iniziativa da la chatscha speziala ha dominà plü o main la prümavaira cun, our da vista da la BKPJV ma eir our da vista dal Uffici, üna finischiun positiva. Pero il tschögn dals 47% votants chi han vuschà per l'iniziativa es gnü arcungniuoschü e la regenza e l'uffizi han provà d'integrar diversas idees, forza nōa güsta ün sün ün, fingià in las prescripziuns da chatscha pel 2019 e quai cun plü o main grond suzcess.

Quista votumaziun ha però cuostü blera energia ed ha chaschunà üna gronda foura in la chascha da la BKPJV. La prosma votumaziun per üna iniziativa, quista vouta insoma cunter nossa chatscha Grischuna, sta davant porta e quai tenor fingià dūrant il 2020. Per quist cumbat esa important cha no tuots chatschaders as unin e cumbatain cumünaivel. Perche quia vaia per o melder dit cunter nossa chatscha ed in prüma lingia per abolir cumplettamaing la chatscha bassa.. Id es important chi's chatta üna fuorma per finanzchar quist cumbat perchè no saran sulets e nu pudain spettar grond agüd dad otras instituziuns.

A la delegiada oura Cazzis han ils delegiats da la Lischana, Juliette Duschen, Jachen Benderer e Fabian Grond pudü represchantar nossa società cun lur vuschs tenor las decisiuns in la radunanza da prümavaira. Grazcha fich als delegiats chi's mettan a disposiziun sainza indemnisaziun.

La fin dal mais mai vaina pudü, cun grond plaschair, surdar als commembers chi han postà e sun pronts da's identifichar cun la Lischana, la giacca da società in occasiun d'üna pitschna festina offrida dals furniturs da la giacca. Quia lessa ingrazchar a Sport Heinrich, a CarloZ Fischjäger e Jon Sport pel grond sustegn. Las diversas acziuns da nossa società, sco per exaimpel il marchà da S-charl ingio cha vain declerà a tuot ils interessents il system dal salvamaint d'usöls cun la drona, ma eir il salvamaint d'usöls svesa e tuot las lavurs da custodi, sun statta gronds suzcess e sgüra eir üna gronda lavur publica per muosar che lavurs chals chatschaders praistan per il bön da nossa natüra.

Il tir intern es statt per tuot quels chi han tut part ün di allegraivel e da cumpagnia. Impustüt han persvas il parcuors da chatscha bassa ed eir darcheu il parcuors da chatsch'ota. Da grond interess es eir stat la passa pels candidats chi's han 3 dis avant lur examen survgni l'ocasiun d'exercitar suot squitsch sumgliaint al examen. A quist lö lessa amo dar ün grondischem ingrazchamaint a tuot il sponsurs chi sun minch'on darcheu pronts d'offrir fich bels premis per noss tir intern. La glista actuala dals sponsurs es eir publichada sün nossa pagina d'internet www.chatscha.ch ! Als 28 avuost vaina gnü lura amo la radunaza d'utuon cun las spiegaziuns da nos guargia chatscha sur da las novitats in las prescripziuns da chatscha 2019 e cun ün cuort reformat da Curdin Florineth cul tema „marcaziuns da sulvaschina cun las cugniuoschentschas“.

Las chatschas in seguit sun idas sur la büna sainza gronds intops ed adonta da l'ora na optimala cun resultats in la media dals ultims 5 ons. Davart da l'uffizi esa gnü lodà

la disziplina dals chatschaders, impustüt in Engiadina Bassa. Quist lod lessa gugent e cun superbgia dar inavant eir a tuotas commembras e commembers da nossa società. Grazcha fich e bravo...

No chatschaders nu'ns vain da zoppar, no fain grond lavur a favur da la flora e fauna, insoma per tuot la natüra. Muossain a la populaziun cha per no chatschaders nu vaja be per schluppettar bes-chas dimpersè chi voul la chatscha chi douvra chatschaders activs per mantgnair nossa cuntrada alpina da bellezza, no eschan protecturs da natüra e bes-chas.

Ün grond success es statt la sairada da refarat chi ha gnü lö als prüms november, cul tema „Leben mit dem Wolf“ chi'd es gnüda organisada da nossa società. Passa 200 persunas han chattà quela saira la via in sala cumünala.

In nom da la suprastanza less eu ingrazchar fich eir als duos refarents , Claudio Spandin ed Adrian Arquint, per lur sustegn ed eir ün ingrazchamaint va als agüdots ed a Flurin Filli chi ha surtut la moderaziun. Sainza quists agüdots nun esa pussibel d'organisar uschè ün bel e grond evenimaint. La suprastanza preveda da repetter uschè üna sairada da refarat eir in avegnir. Il termin pel 2020 as vezza sül program da l'on.

Im resta be amo, in nom da tuot la suprastanza, d'ingrazchar per vossa fiduzchia e per vossa actività d'urant l'on.

No giavüschain a tuots ün bun on nouv, ün schlat in bocca d'luf ed üna bell temp da cumpagnia pro las activitats da la Lischana il 2019.

Vos president

Mario Duschen